

## Morning Dogri (NSD) National News Bulletin 25-04-2024

आकाशवाणी

खबरां अभिलाषा शर्मा कोला।

1. मुख्य भरै दे 13 राज्यें ते केन्द्र शासत प्रदेशें दिऐं कुल 88 लोकसभा सीटें लेई कल मतदान होग।
2. लोकसभा दे चौथे गेड़ दे चुनां लेई नामजदगियां दाखल करने दा अज्ज खीरी ध्याड़ा ऐ। इस गेड़ तैहत कुल 96 लोकसभा सीटें लेई वोट पोआए जांगन।
3. छत्तीसगढ़ दे ढंतेवादा च 18 माओवादिऐं सीआरपीएफ ते मकामी पुलस अगगे आत्मसमर्पण करी दित्ता ऐ।
4. भारती मौसम विभाग नै देसै दे पूर्वी ते दक्खनी प्रायद्वीपीय इलाकें च अगले 5एं दिनें दरान जबरदस्त लूह चलने दे असार जताए न।
5. दुबई च एशियाई अंडर-20 एथलेटिक्स चैंपियनशिप च दीपांशु शर्मा नै मर्दे दे भाला सुट्टने आले मकाबले च सुन्ने दा तगमा जिसलै के 3 होरनें भारती खडारिएं चांदी दे तगमे जित्ते न।

<><><><><><>

### **Lok Sabha-2<sup>nd</sup> Phase**

लोकसभा चुनाएं दे दुऐ चरण लेई तैआरियां जोरें-शोरें कन्नै जारी ऐ जित्थें कल 26 अप्रैल गी मतदान होग। इस चरण लेई चुनां प्रचार कल संजा खत्म होई गेआ। मणिपुर लोकसभा क्षेत्र दे बाकी हिस्से समेत 13 राज्यें ते केन्द्र शासत प्रदेश च 88 लोकसभा सीटें लेई चुनां होंगन। केरल दी 20 सीटें, कर्नाटक दी 14 सीटें, राजस्थान दी 13, उत्तर प्रदेश ते महाराष्ट्र दी 8-8 सीटें, मध्यप्रदेश दी 6 सीटें, असम ते बिहार च 5-5 सीटें, पच्छिम बंगाल ते छत्तीसगढ़ दी 3-3 सीटें ते 1-1 सीट लेई मणिपुर, त्रिपुरा ते जम्मू कश्मीर च मतदान होग। मध्यप्रदेश दे बीटल संसदीय क्षेत्र लेई जित्थें दुऐ गेड़ च मतदान होना हा, बीएसपी मेदवार दे निधन कारण हुन त्रिये गेड़ च मतदान कीता जाग। इस गेड़ च आउटर मणिपुर लोकसभा

क्षेत्र दे 4 मेदवारें दे कन्नो कन्नी 13 राज्यें ते केन्द्र शासत प्रदेशें दे कुल 1 जहार 198 मेदवार मैदान च न।

<><><><><><>

## LS-4<sup>th</sup> Phase Nomination

लोकसभा चुनाएं दे चौथे गेड़ लेई नामांकन भरने दा अज्ज खीरी ध्याड़ा ऐ। नामांकन पत्रें दी कल जांच कीती जाग ते जेहड़े मेदवारें दी नामजदगी आले कागज पत्र सेही पाए जांगन, ओह जेकर चाहन ते इस म्हीने दी 29 तरीक तोड़ी अपनी नामजदगी वापस लेई सकदे न। इक केन्द्र शासत प्रदेश सनें 9 राज्यें थमां 96 लोकसभा सीटें पर इस गेड़ च 13 मई गी चुनां होंगन। इस गेड़ च उत्तर प्रदेश, मध्यप्रदेश, महाराष्ट्र, बिहार, झारखंड, ओडिशा, पच्छिम बंगाल, आंध्रप्रदेश, तेलंगाना ते जम्मू कश्मीर च मतदान होग।

<><><><><><>

## PM

भारती जनता पार्टी दे वरिष्ठ नेता ते प्रधानमंत्री नरेन्द्र मोदी होर अज्ज मोरेना च इक जनसभा गी संबोधत करगंन। उआं चौथे गेड़ तैहत मध्यप्रदेश दे 8 लोकसभा हल्कें लेई नामांकन भरने दा अज्ज खीरी ध्याड़ा ऐ। मध्यप्रदेश च अजे तगर चौथे ते खीरले गेड़ लेई 58 मेदवारें आस्सेआ 83 नामांकन पत्र भरे गे न। चौथे गेड़ च देवस, मांडसौर, रतलाम ढार, उज्जैन, इंदौर, खारगोन ते खांडवा थमां वोट पाए जांगन। राज्य च इसलै चुनां प्रचार जोरें-शोरें कन्नै जारी ऐ। प्रधानमंत्री मोदी होर अज्ज बडलै 11 बजे मोरेना दे पुलस परेड ग्राउंड च इक जनसभा गी संबोधत करगंन। प्रधानमंत्री होरें कल बी मध्यप्रदेश दे सागर ते बेतुल लोकसभा हल्कें च बैठकें गी संबोधत कीता ते भोपाल च इक रोड शो बी कीता। उआं कांग्रेस दे प्रदेश प्रधान जीतू पटवारी, राजस्थान दे साबका उपमुखमंत्री सचिन पायलट, साबका केन्द्रीय मंत्री अरुण यादव ते राज्यसभा दे सदस्य विवके तानखा होर कांग्रेस दे मेदवारें लेई अज्ज उज्जैन, मांडसौर ते देवस च किट्ठे रलियै चुनां प्रचार करगंन।

<><><><><><>

## PM-Delhi

प्रधानमंत्री नरेंद्र मोदी होरें आखेआ ऐ जे बेहतर कल आस्तै मजबूत बुनियादी ढांचे च निवेश जरूरी ऐ। प्रधानमंत्री होरें आपदा प्रतिरोधी बुनियादी ढांचे पर 6में अंतर्राष्ट्री सम्मेलन च इक वीडियो संदेश च आखेआ जे आपदाएं गी अकसर आर्थिक नुकसान दी नजरी कन्नै दिक्खेआ जंदा ऐ पर एहदा व्यक्तिएं, परोआरें ते समुदायें पर असल च बड़ा मता प्रभा पौंदा ऐ। उनें नमीं बुनियादी ढांचा परियोजनाएं ते आपदा दे बाद पुर्ननिर्माण दे जत्नें च मजबूती दे पैहलु पर जोर दित्ते जाने दी लोड़ पर बी बल दित्ता। श्री मोदी होरें आखेआ जे आपदाएं दा असर सीमाएं थमां परे हुंदा ऐ ते एहदे नै निब्बड़ने लेई देशें बश्कार सैहयोग जरूरी ऐ। दऊं दिनें दा एह सम्मेलन अज्ज नमीं दिल्ली च शुरू होआ।



## Defence Secretary

भारती रक्षा सचिव गिरिधर अरमाने अज्ज कजाखस्तान दी राजधानी अस्ताना च आयोजित शंघाई सैहयोग संगठन-एससीओ दे रक्षा मंत्रिण दे सलाना सम्मेलन च भारती प्रतिनिधिमंडल दी अगुवाई करगंन। इस सम्मेलन च एससीओ मुखें दे इलाकाई मुद्दें ते आपसी रक्षा सैहयोग कन्नै जुड़ी दी पैहलकदमिण दी समीक्षा कीती जाग। दऊं दिनें दी इस यात्रा दरान रक्षा सचिव होर मंत्री स्तर दी गल्लबात च भारत दा पक्ख रक्खगंन।



## Surrender

छत्तीसगढ़ दे ढंतेवाड़ा जिले च इक माओवादी पलटन कमांडर ते त्रै महिलाएं सनें कुल 18 माओवादिणं पुलसै अग्गे आत्मसंमर्पण करी दित्ता। इनें माओवादिणं लोन वर्गाटु अभियान दे तैहत सीआरपीएफ ते ढंतेवाड़ा पुलस अग्गे आत्मसंमर्पण कीता। पुलसै मूजब आत्मसंमर्पण करने आले इनें सब्बनें माओवादिणं गी छत्तीसगढ़ सरकार दी 25-25 जहार रपें दी प्रोत्साहन राशि ते होर दुए फायदे बी दित्ते जांगन।



## IMD

भारतीय मौसम विभाग नै अगले 5एं दिनें दरान पूर्वी ते दक्खन भारत दे प्रायद्वीपीय इलाकें च जबरदस्त लूह दी स्थिति जारी रौहने दी संभावना जताई ऐ। ओडिशा, पच्छिम बंगाल,

उप-हिमालायाई, सिक्किम ते कर्नाटक दे अंदरूनी इलाकें च जबरदस्त लूह दी पेशगोई कीती ऐ ते बिहार, झारखंड, तटीय आंध्रप्रदेश, तेलंगाना ते पूर्वी उत्तर प्रदेश च बी मती गर्मी दी संभावना जताई ऐ। मौसम विभाग नै आक्खेआ ऐ जे मध्य ते पूर्वी भारत च बद्धोबद्ध तापमान च 2 थमां 3 डिग्री सैल्सियस दा बाद्धा होग। उआं मौसम विभाग नै उत्तर-पच्छिम भारत च मुख्त तौर पर 26 थमां 28 अप्रैल तगर बरखा बरने दी संभावना जताई ऐ। अरुणाचल प्रदेश , असम, मेघालय, नागालैंड, मणिपुर, मिजोरम ते त्रिपुरा च हल्की थमां दरमेयाने दर्जे दी बरखा बरने दी संभावन ऐ ते शनिवारें ते ऐतवारें पूर्वोत्तर भारत च गरज-चमक ते तेज हवाएं कन्नै भारी बरखा होने दी संभावना जताई गई ऐ।



## US-Tik Tok

अमरीकी राष्ट्रपति जो बाइडेन होरें इक बिल पर दस्तखत कीते न जेहदे कन्ने टिकटॉक पर रोक लाई जाई सकदी ऐ। चीन दे बाइटडांस गी टिकटॉक ऐप गी मार्किट थमां हटाने लेई जां फही इस ऐप गी कुसै अमरीकी कंपनी गी बेचने लेई 9 म्हीने दा समां दित्ता गोआ ऐ। एह कनून इस चिंता च पास कीता गोआ ऐ जे टिकटॉक चीनी अधिकारिणं गी यूसर डाटा उपलब्ध करोआई सकदा ऐ। अमरीकी सीनेट नै कल इस बिल गी मंजूरी देई दित्ती। एहदे परते च टिकटॉक नै इस कनून गी असंवैधानिक करार दित्ता ते आक्खेआ जे ओह इसगी अदालत च चुनौती देग। इस बिल गी यूक्रेन, इजराइल ते भारत प्रशांत क्षेत्र होरने अमरीकी सांझेदारें लेई फौजी मदाद सनें 4 बिलें दे पैकेज दे इक हिस्से दे तौर पर पारित कीता गोआ ऐ ते 79 सांसदें एहदा समर्थन कीता ऐ।



## PM-Message

राष्ट्रपति द्रौपदी मुर्मू ते उपराष्ट्रपति जगदीप धनखड़ होरें उत्तर प्रदेश दी शयरस लोकसभा सीट थमां बीजेपी दे सांसद राजवीर सिंह दिलर हुंदे निधन पर संवेदना जताई ऐ। अपने शोकम सनेह च राष्ट्रपति होरें आक्खेआ जे राजवीर हुंदे निधन दी खबर बड़ी दुख आली ऐ। उनें उत्तर प्रदेश दे लोकें दे विकास लेई लगातार कम्म कीता ऐ। उपराष्ट्रपति होरें आक्खेआ जे लोकतांत्रिक मुल्यें लेई राजवीर हुंदी प्रतिबद्धता ते लोकें दे कल्याण लेई उंदे निस्वार्थ भाव गी म्हेशां चेता कीता जाग।

प्रधानमंत्री नरेन्द्र मोदी होरें बी उत्तर प्रदेश दी शायरस लोकसभा सीट थमां बीजेपी सांसद राजवीर सिंह दिलर हुंदे निधन पर संवेदना जताई ऐ। अपने शोक संदेश च प्रधानमंत्री होरें आक्खेआ जे दिलेर हुंदे निधन कन्नै उनेंगी बड़ा दुख ऐ ते एह पार्टी लेई बड्डा नुकसान ऐ। मोदी होरें आक्खेआ जे उनेंगी जमीनी स्तर पर उंदे कम्मं लेई म्हेशां चेता कीता जाग। प्रधानमंत्री होरें सौहगी परोआर कन्नै संवेदना जताई ऐ। राजवीर सिंह दिलेर हुंदा कल दिल दा दौरा पौने करी निधन होई गेआ। ओह 65एं बरें दे हे।

<><><><><><>

## Telangana Accident

तेलंगाना च बक्ख-बक्ख थाहरें पर शिड़क हादसें कन्नै 10 लोकें दी मौत होई गई। जंदी रातीं इलाडू ग्रां कोल वारंगल खगम हाइवे पर इक बाईक ते बस कन्नै टकराने करी 4 लोकें दी मौत होई गई। पुलस नै दस्सेआ ऐ जे त्रऊं लोकें दी मौत मौके पर गै होई गई जिसलै के इलाज दरान इक नै अपना दम त्रोड़ी दित्ता। इक होर हादसे च जेहड़ा सूर्यापेट जिले च दुर्गापूरम स्टेग च बडलै सवेले पेश आया, 6 लोकें अपनी जान मुहाई दित्ती ते 4 जख्मी होई गे। एह हादसा उसलै पेश आया जिसलै इक कार नै खड़ोते दे ट्रकै गी टक्कर मारी। कार च सफर करा'रदे 6एं लोकें जिंदे च इक महिला ते इक न्याणा शामिल ऐ अपना दम त्रोड़ी दित्ता। ओह हैदराबाद थमां विजयवाड़ा लेई सफर करा'रदे हे। सूत्रें साब्वै खराबी दी वजह कन्नै ट्रक गी जरनैली शिड़कै दे कंडे खड़ोते दा हा।

<><><><><><>

## Athletics

दुबई च एशियाई अंडर-20 एथलेटिक्स चैंपियनशिप दे शुरूआती दिन दीपांशु शर्मा नै मर्दे दे भाला सुट्टने आले मकाबले च सुन्ने दा तगमा जित्तेआ जदके 3 होरनें भारती खडारिएं चांदी दे तगमे जित्ते। मर्दे दे भाला सुट्टने आले मकाबले च दीपांशु नै 70.29 मीटर दी दूरी दे कन्नै सुन्ने दा तगमा जित्तेआ। जदके रोहन यादव नै 70.03 मीटर दी दूरी कन्नै चांदी दा तगमा जित्तेआ। तोआई मर्दे दी 1500 मीटर द्रौड़ च प्रियांशु नै 3 मिंटे ते 50.85 सकिंटें दा समें लेइयै चांदी दा तगमा हासल कीता। एहदे शा पैहले रितिक राठी नै मर्दे दे डिस्क-थ्रो मकाबले च चांदी दा तगमा जित्तेआ ते प्रतियोगिता च भारत लेई तगमा जित्तेने आले पैहले एथलीट बने। पिछले बरें भारत इस प्रतियोगिता च सुन्ने दे 6 तगमें सनें 19 तगमें हासल

करिये त्रिये नंबरै पर रेआ हा। दुबई च अंडर-20 एथलेटिक्स प्रतियोगिता च कुल 60 भारतीय एथलीट हिस्सा लै करदे न, जिंदे च 31 मर्द ते 29 महिलां शामिल न। एह प्रतियोगिता विश्व अंडर-20 एथलेटिक्स प्रतियोगिता लेई क्वालीफाइंग इवेंट बी ऐ जेहड़ा इस बरे अगस्त म्हीने लीमा पेरू च आयोजित कीता जाग।



## IPL

आईपीएल क्रिकेट च दिल्ली कैपिटल्स नै कल इक दिलचस्प मकाबले च गुजरात टायटंस गी 4 रंजें कन्नै हराई दित्ता। पैहले बल्लेबाजी करदे होई दिल्ली कैपिटल्स दी टीम नै 20 ओवरें च 4 विकेटें दे नुकसान पर 224 रंज बनाए। कप्तान रिषभ पंत नै 42 गेंदें च 88 रंज बनाइयै नाबाद रेह। जिसलै जे अक्षर पटेल नै 43 गेंदें च 66 रंजें दा योगदान दित्ता। गुजरात दी तरफा संदीप शर्मा नै दिल्ली दे त्रै खडारी आउट कीते। एहदे परते च गुजरात टायटंस दी टीम नै जित्त लेई लोडचदे 225 रंजें दे लक्ष्य दा पिच्छा करदे होई मित्थे गेदे 20एं ओवरें च 8 विकेटां मुआइयै 220 रंज गै बनाई सकी। साई सुदर्शन नै 29 गेंदें च 65 रंज ते डेविड मिलर नै 23 गेंदें च 55 रंज बनाए। अज्ज संजा साढ़े 7 बजे हैदराबाद च सनराइजर्स हैदराबाद दा मकाबला रॉयल चैलेंजर्स बैंगलोर कन्नै होग।

